

Na 47. godišnjicu Ekonomskog fakulteta Brčko promovisani diplomirani ekonomisti i masteri ekonomije

Ekonomski fakultet Brčko obilježio je 47. godišnjicu postojanja. Tim povodom, organizovana je svečana dodjela diploma studentima prvog i drugog ciklusa studija.



Prisutne u velikom amfiteatru Ekonomskog fakulteta najprije je pozdravio dekan prof. dr Srđan Lalić, a potom i prorektor Univerziteta u Istočnom Sarajevu za ljudske i materijalne resurse prof.dr Radislav Lale. Ekonomski fakultet Brčko jedan je od 17 fakulteta koji djeluju u okviru Univerziteta u Istočnom Sarajevu. Obilježavanju Dana Ekonomskog fakulteta prisustvovao je i gradonačelnik Brčko distrikta BiH, kao i Zoran Bulatović, šef Odjeljenja za obrazovanje u Vladi Brčko distrikta BiH. Svršene studente, zvanice, profesore, goste i prisutne pozdravio je i prof. dr Milan Tomić, bivši dekan ovog fakulteta.



Povodom Dana fakulteta, za dugogodišnji rad i doprinos u radu fakulteta, zahvalnice su uručene Nikolini Gušić, Stani Radovanović, Mari Đurić i prof. dr Lazaru Radovanoviću, prethodnom dekanu.



Diplome i poklone najboljim i svršenim studentima i novim članovima akademske zajednice uručili su gradonačelnik Brčko distrikta Bosne i Hercegovine prim. dr Zijad Nišić i dekan Ekonomskog fakulteta prof. dr Srđan Lalić.

Poklon bonovi najboljim studentima, sa najvećim prosjekom, uručeni su studentkinji prve godine Amini Trumić, studentkinji druge godine Dušanki Lukić, studentkinji treće godine Elmedini Fazlović i studentu četvrte godine Anisu Trumiću, koji je promovisan i kao najbolji diplomirani student na osnovnim studijama.

Zahvalnice za dosadašnji doprinos u radu fakulteta, kao studenti istraživači, dobili su: Pero Petrović, Nikolina Marković, Elmedina Fazlović, Hasan Mešić, Dušanka Lukić i Ajla Arifović

Poziv mladima da svoja znanja ugrade u budućnost Brčko distrikta BiH

Gradonačelnik Zijad Nišić čestitao je bivšim studentima na postignutom uspjehu, istakavši da to nije samo njihov uspjeh, nego i uspjeh profesora i roditelja.

„Ponosan sam što je na ovom fakultetu proizvedeno mnogo mladih obrazovanih ljudi. Vlada Brčko distrikta Bosne i Hercegovine će nastaviti podržavati ovaj trend i svakako računamo da ćete svoja znanja i vještine inkorporirati u našu lokalnu zajednicu, da gradite svoju budućnost, ali i budućnost Brčko distrikta BiH“, istakao je gradonačelnik u obraćanju diplomcima.



Šef Odjeljenja za obrazovanje u Vladi Brčko distrikta BiH Zoran Bulatović čestitao je rukovodstvu Ekonomskog fakulteta Brčko Univerziteta u Istočnom Sarajevu na dosadašnjem radu, istakavši da je Odjeljenje za obrazovanje uvijek spremno za podršku ovom fakultetu.

Dekan Ekonomskog fakulteta Brčko prof. dr Srđan Lalić istakao je da je misija ovog fakulteta da se broj studenata poveća.

„Smatrajte da jednom kada se uđe u porodicu Ekonomskog fakulteta, nije cilj da se izađe, nego da uvodimo nove generacije i da nas iz godine u godinu bude sve više“, istakao je dekan Lalić.

Upravni odbor DUALSCI projekta održao sastanak na Ekonomskom fakultetu Brčko

Svečanosti dodjele diploma prethodio je sastanak Upravnog odbora DUALSCI projekta. Riječ je o jednom od najznačajnijih projekata za unapređenje visokog obrazovanja u BiH, koji predlaže novi obrazovni pristup kojim bi visokoškolske ustanove u BiH bile više profesionalno orijentisane, sa naglaskom na omogućavanje konkretnih radnih vještina i praksi za studente.

Princip dualnog visokog obrazovanja je povezivanje poslodavaca i studenata sa tačno definisanim vještinama ili potencijalom da ih steknu. Ovakav način obrazovanja nudi studentima priliku da steknu prijeko potrebno radno iskustvo i prije sticanja diplome, čime kasnije postaju konkurentniji na tržištu rada. Implementacija dualnog visokog obrazovanja zahtijeva od visokoškolskih ustanova da razviju takve studijske programe koji su u velikoj mjeri kompatibilni sa budućom profesijom studenata i sveukupno stvaraju nastavni ambijent sličan onom na radnom mjestu.

Ovaj projekat, koji se realizuje u okviru Erasmus+ programa koji implementira Evropska unija, trebalo bi da obezbjedi pravni osnov za uspostavljanje trenutno nepostojećih dualnih studija visokog obrazovanja u BiH, a dugoročno gledano, i osnov za internacionalizaciju, zbog bolje kompatibilnosti sa sistemima visokog obrazovanja u stranim državama koje djeluju po ovom programu.

U brojnim strateškim dokumentima u oba entiteta i na državnom nivou, dualno obrazovanje je navedeno kao jedan od prioriteta i pravaca razvoja. Jasan cilj projekta je i modernizacija svih studijskih programa u skladu sa potrebama različitih oblasti rada, kao i usaglašavanja neophodnih kvalifikacija.

Album sa dodjele diploma studentima i zaslužnim pojedincima na [ovom linku](#) facebook stranice Ekonomskog fakulteta.